

菩薩摩訶薩欲修諸善根度衆生當學般若波羅蜜

「大智度論」集粹之廿九

智
銘

(續上期)

立禪者，菩薩於衆生前，讚嘆禪定清淨樂、內樂、自在樂，離罪樂，今世、後世樂，聖所受樂，梵天王樂，徧身受樂，深厚妙樂；汝諸衆生，何以著五欲不淨樂，與畜生同受諸罪垢樂，而捨是妙樂？若汝能捨小樂，則得大樂。智者能棄世間之樂，得甚深禪定樂。既得此樂，反觀欲樂，甚爲不淨，如從獄出；如病久得瘥，更不求樂。復次，禪定名實智初門，令智慧澄靜，能照諸法。若依禪定得四無量、背捨、勝處、神通、辯才等；諸甚深功德，悉皆具得。隨意所爲，無不能作；神通變化，皆從禪得。衆生聞是已，立於禪波羅蜜。

立般若波羅蜜者，菩薩教諸衆生：當學智慧，智慧者，其明第一，名爲慧眼。若無慧眼，雖有肉眼，猶故是盲；雖云有眼，與畜生無異。若有智慧，自別好醜，不隨他教；若無智慧，隨人東西，如牛、駱駝穿鼻隨人。一切有爲法中，智慧爲上。聖所親愛，能破有爲法故。觀諸苦惱衆生，無不悉見。智慧刀能斷無始煩惱生死連鎖；智慧力故，能具六波羅蜜，得不可思議無量佛道，成一切智，何況聲聞、辟支佛，及世間勝事？是智慧增長清淨，不可沮壞，名爲波羅蜜。衆生聞已，住般若波羅蜜。

復次，菩薩或時不以口教，或現神足光明，令衆生住六波羅蜜，或現種種餘緣，乃至夢中爲作因緣，使其覺悟，令衆生具六波羅蜜。是故經言：欲令衆生住六波羅蜜，當學般若波羅蜜。

佛言：「欲植一切善根於福田中，至得阿耨多羅三藐三菩提不盡者，當學般若波羅蜜。」善根者，三善根：無貪善根；無瞋善根；無癡善根。一切諸善法，皆從三善根生增長。以是故名爲諸善根。今言善根者，善根因緣供養之具，所謂華香、燈明、及法供養，持戒誦經等，因中果說。何以故？華香不定，以善心供養故，名爲善根。布施非即是福，但能破慳貪，開善法門；善根名爲福。一者：若華、若香、若燈明、若禮敬、若誦經、持戒，若禪定，若智慧等，一一供養及法養供，植於諸佛福田中。

佛田者，十方三世諸佛；若佛在世，若形像，若舍利，若但念佛。植者，專心堅著。經有言種種福田，佛爲第一福田，以十

力，四無所畏，十八不共法；如是等無量佛法具足，是故獨說植於佛田。法寶雖為佛師，若佛不說，法為無用。以是故，法寶雖上而前說佛寶。復次，佛田能獲無量果報，餘者雖言無量而有差降；以是故，佛田第一。

不盡者，諸佛成就無盡功德故，於中植福，福亦無盡。復次，佛功德無量、無邊、無數、無等故，植福者福亦不盡。佛為菩薩時，緣一切眾生，如眾生無量、無邊故，福亦無盡。佛田清淨，拔一切愛等諸煩惱穢草，淨戒為平地，大慈悲為良美，除諸惡邪鹹土；三十七品為溝塍，十力、四無所畏、四無礙智、等為垣牆，能出生三乘涅槃果報；種植於此無比無上田者，其福無盡。

一切有為法，無常相故，皆歸於盡，福從因緣生，何得謂為無盡？此所以言無盡者，非言常不盡，是言自種福因緣時起，至得佛中間不盡。復次，一切有為法，雖念念生滅，相續不斷，果報不失故，名為不盡，深心種福於良田故，乃至法盡而亦不盡。復次，菩薩知諸法實相，如涅槃不盡，福德入諸法實相故，而亦不盡。

涅槃不盡，是福者以智慧力故，令是功德如涅槃畢竟空，不生不滅，以是故，喻如涅槃，非即涅槃。若福即是涅槃，則不應為喻。若是涅槃，云何果報成佛而不盡？譬如三解脱門：空、無相、無作。如解脫畢竟空相，是空解脫門，觀世間亦畢竟空；如解脫無相相，是無相解脫門，觀世間亦無相相；如解脫無作相，是無作解脫門，觀世間亦無作相。以是故說：欲植一善根於佛福田，乃至阿耨多羅三藐三菩提而不盡者，當學般若波羅蜜。

佛言：「菩薩摩訶薩欲令十方諸佛稱讚其名，當學般若波羅蜜。」菩薩摩訶薩，觀諸法畢竟空，內無吾我，已破憍慢，云何欲令十方諸佛稱讚其名？蓋佛法有二門：一、為第一義門；二、為世俗法門。以世俗法門故，欲令諸佛讚歎；雖為諸佛所讚歎，而不見我，不取眾生相，世間假名故說。復次，餘人餘象生，貪欲、瞋恚、愚癡覆心故，不能如實讚歎。何以故？若偏有所愛，不見實過，但見功德，若偏有所瞋，但見其過，不見其

德；若愚癡多，不能如實見其好醜。諸天、世人雖有智慧，三毒薄者，亦不能得如實讚歎，猶有謬失；無一切智故，結使不盡故，聲聞、辟支佛三毒雖盡，亦不能如實讚，猶有餘氣未盡；又智慧不具足故。唯佛一人，三毒及氣永盡，成就一切智故，能如實讚，不增不減。以是故，行者欲得諸佛所讚，知其實德，不求餘人稱讚。

諸佛出於三界，不著世間，無有我及我所；視於外道惡人，大菩薩、阿羅漢，一等無異。而獨讚歎菩薩者，佛雖無吾我，無有憎愛，於一切法，心無所著，憐愍眾生，以大慈悲心引導一切故，為分別善人而有所讚。亦欲壞破惡魔所願；以佛讚歎故，無量眾生愛樂菩薩，恭敬供養，後皆成就佛道。以是故，諸佛讚歎菩薩。

佛於大眾中說法，欲令眾生入甚深法，讚是菩薩，如薩陀波崙等。復次，佛讚歎菩薩言：是菩薩能觀諸法畢竟空，亦能於眾生成大慈悲。能行生忍，亦不見眾生；雖行法忍，於一切法而不生著；雖觀宿命事，不墮邪見；雖觀眾生入無餘涅槃，而不墮邊見；雖知涅槃是無上實法，亦能起身、口、意善業；雖行生死中，而深心樂涅槃；雖住三解脱門觀於涅槃，亦不斷本願及善行。如是等種種奇特功德，甚為難有。復次，若菩薩未得無生忍，未得五神通，生死肉身，有大慈悲心，能為眾生故；內、外所有所貴惜者，悉能施與。是故，諸佛讚歎其德。

若菩薩入法位，得神通，行苦行，不足為難；以是菩薩生身肉眼，志願弘曠，有大悲心，愛樂佛道，行如是事甚為希有。復次，若菩薩持戒清淨具足，無所分別，持戒、破戒；於一切諸法畢竟不生，常空法忍。精進不休不息，不著不厭，精進、懈怠，一相不異；無量無邊無數劫，勤修精進。都欲受甚深禪定，無所依止，定亂不異，不起於定而能變身無量，徧至十方說法度人。行深智慧，觀一切法不生不滅，非不生非不滅，亦非不生亦非不滅，非非不生非非不滅，過諸語言，心行處滅；不可壞，不可破，不可受，不可著；諸聖行處，淨如涅槃，亦不著是觀，意亦不沒，能以智慧而自饒益。如是菩薩，諸佛讚歎。

復次，菩薩未得受記，未得無生法忍，生不值佛，不見賢聖；以正思惟故，能觀諸法實相，雖觀實相心亦不著。如是菩薩，十方諸佛皆共讚歎。復次，菩薩聞甚深無量無邊不可思議佛法，雖自未得，智慧未及，而能定信心樂，不生疑悔；若魔作佛來詭說其意，意無增減。如是菩薩諸佛所讚。

復次，有諸菩薩，一時發心，中有疾成佛者，佛則讚歎，有大精進力故。如釋迦牟尼佛與彌勒等諸菩薩，同時發心，釋迦牟尼佛精進力故，超越九劫。復次，若有菩薩具足菩薩事，所謂十地、六波羅蜜、十力、四無所畏、四無礙智、十八不共法等，無量清淨佛法；為衆生故，久住生死，不取阿耨多羅三藐三菩提，而廣度衆生。如是菩薩，諸佛讚歎。如文殊師利、毗摩羅詰、觀世音、大勢至、偏吉等，諸菩薩之上，出於三界，變化無央數身，入於生死，教化衆生故。如是希有事，皆從甚深般若波羅蜜生。以是故說：欲得諸佛讚歎其名，當學般若波羅蜜。

佛言：「菩薩摩訶薩，欲一發意，至十方如恆河沙等世界，當學般若波羅蜜。」菩薩得身通變化力，作十方恆河沙等身，於十方恆河沙等世界，一時能到。經說五事不可思議：所謂衆生多少，業果報，坐禪人力，諸龍力，諸佛力。於五不可思議中，佛力最不可思議，菩薩入於禪定，生不可思議神通故。一念中悉到諸佛世界。如說四種神通中，唯佛、菩薩有如意疾徧神通。以無生忍力故，破諸無明煩惱，即時一念之中，作無量身徧至十方。

復次，菩薩一切無量世界，悉已消滅，以智慧力故，能轉一切諸法，所謂小能作大，大能作小，能以無量千百劫為一日，又能以一日為千萬劫。是菩薩世間之主，所欲自在，何願不滿？如毗摩羅詰經所說，以七夜為劫壽。以是因緣故，菩薩乘神通力，能速疾超越十方世界。前五不可思議中，無有菩薩，而此言：「菩薩入於定，生不可思議神通故。」者，或時因中說果，或時果中說因，菩薩為因，諸佛為果，若說佛力不可思議，當知已說菩薩。以是故言：欲一發意到十方恆河沙世界者，當學般若波羅蜜。

佛言：「菩薩摩訶薩欲發一音，使十方如恆河沙等世界聞聲，當學般若波羅蜜。」菩薩得六神通，增長梵聲相，過三千大千世界，至十方恆河沙等諸世界。菩薩音有恆河沙等之數，佛音所到無有限數。如密跡經中說：目連試佛音聲，極至西方，猶聞佛音，若如對面。佛音有二種：一為口密音聲；二為不密音聲。密音聲，先已說。不密音聲，至佛邊乃聞。是亦有二種弟子：一為出世聖人；二為世間凡夫。出世聖人如目連等，能聞微密音聲，凡夫人隨其所近乃聞。復次，諸菩薩得入正位，離生死身，得法性真形，能見十方無量佛身，及徧照光明，亦能得聞諸佛六十種極遠無量音聲。諸大菩薩雖未具足如佛音聲，於佛音聲中並得其分。是佛菩薩音聲有三種：一者、先世種善音聲因緣故，咽喉中得微妙四大，能出種種妙好遠近音聲，所謂一里、二里、三里、……乃至三千大千世界，音聲徧滿。二者、神通力故，咽喉四大出聲，徧滿三千大千世界，及十方恆河沙世界。三者、佛音聲當能徧滿十方虛空。

佛音雖徧滿十方虛空，今衆生所以不聞者，是衆生無量劫來，所作惡業覆，是故不聞。如今世人精進持戒者，於念佛三昧心得定時，罪垢不障，即得見佛。聞佛說法，音聲清了。菩薩於三種音聲中，欲得二種，是二種音聲，甚難希有故，如業果音聲，自然可得故。以是故說：菩薩摩訶薩，欲以一音使十方恆河沙等世界聞聲者，當學般若波羅蜜。

佛言：「菩薩摩訶薩欲使諸佛世界不斷者，當學般若波羅蜜。」佛世界不斷者，菩薩欲令國國相次，皆使衆生發心作佛。菩薩心願，欲令一切世界，皆悉作佛，大心曠遠，無有音限。以是心集諸智慧，無量福德神通力故。又隨衆生種作佛因緣者，是菩薩皆悉令作。若一切世界皆種作佛因緣者，餘佛菩薩不應有益，但是事不然。復次，十方世界無量無邊，不應一菩薩盡得徧諸世界，令佛種不斷；諸餘菩薩各隨因緣，皆有其分。以慈悲大故，願亦無量，利益之心，無有齊限。衆生種無量故，非一佛一菩薩所可盡度。

(下轉第29頁)

註釋：

- ① 嘉慶新安縣志卷四山水畧。
- ② 文見凌雲佛學研究社五週年紀念刊（民國二十七年八月出版）頁九十。
- ③ 同上，頁八十。
- ④ 寶安縣厦村鄧氏族譜九世祖洪儀公條。所據為香港大學馮平山圖書館所藏之影印鈔本，一冊。此譜所載較為簡約。
- ⑤ 港大現藏錦田鄧氏師儉堂家譜兩種：一為兩冊線裝影印鈔本，未署修撰人名；另一為鄧惠翹先生於一九六六年丙午續修，一冊，依鈔本影印，此處據自前者，頁一〇一。
- ⑥ 原文述：「何氏乃東莞伯何榮公之侄女。」應更正為何真；另見南陽鄧氏族譜源流系攷，九世祖洪贊公譜系表。
- ⑦ 參見明史卷一百三十，列傳第十八，何真傳。
- ⑧ 參見明史卷一百〇五，表第六。
- ⑨ 參見明史卷一百三十二，列傳第二十，藍玉傳。
- ⑩ 即魏國公馮勝、鄂國公常遇春，二人死後被迫追封為王。
- ⑪ 即宋國公馮勝、穎國公傅友德。
- ⑫ 見世界書局新校明通鑑卷十，頁三〇六。
- ⑬ 明太祖於洪武二十六年九月初十所頒之赦藍胡二黨詔謂：「藍賊為犯，謀殺擒拿族諸，已萬五人矣。」此據自吳相湘主編之中國史學叢書明朝開國文獻第四冊，廿二史劄記卷三十二亦云族誅萬五千人，故應以萬五千人為準。
- ⑭ 據明史紀事本末卷十三胡藍之獄一文。
- ⑮ 見潘樞章撰國史考異高皇帝下之十五；另參陳伯陶撰東莞縣志卷三十一前事畧三。
- ⑯ 據錦田鄧氏師儉堂家譜之錦田歷史一文，頁八十一。
- ⑰ 見鄧惠翹先生一九六六年丙午續修鄧氏師儉堂家譜十五世起派九世祖洪儀條。
- ⑱ 見該書第九章第三節註三十六，頁二一七。
- ⑲ 岑田，即今新界錦田。其得名由來，據錦田鄧氏師儉堂家譜之錦田歷史一文載云：「……則因萬曆十五年，寶安旱災，義倉盡罄，知縣邱公體乾下鄉籌賑，各處捐助，少者三數石，多者亦不過二、三十石，獨洪儀祖之七代孫元勳公，慷慨捐穀二千石，備受褒獎，邱公見吾鄉土地膏腴，田疇如錦，遂易名曰錦田……。」
- ⑳ 應為「宣德」。

- ㉑ 據錦田鄧氏師儉堂家譜錦田歷史一文，頁八十一。
- ㉒ 見鄧惠翹撰續修師儉堂家譜小引一文。
- ㉓ 據凌雲佛學研究社五週年紀念刊，頁八十四。
- ㉔ 見明史卷四十一，志第十七，地理二，山東遼東都指揮使司條。
- ㉕ 羅香林教授撰香港前代史註三十八，頁二一七。
- ㉖ 同上。

（上接第32頁「大智度論」集粹之廿九）

菩薩欲令心願曠大清淨故，如行慈三昧，雖不能令眾生離苦，但自欲令心曠大清淨，成利益願。如諸佛大菩薩力，皆能度一切，而眾生福緣未集，未有智慧，因緣不令故，而不得度。佛有大慈悲智慧無量無邊，悉能滿足眾生，而眾生罪業因緣故而不值佛。設得值佛，如餘人無異，或生瞋恚，或起誹謗，以是因緣故，不見佛威相神力，雖得值佛而無利益。

二因二緣，發於正見，所謂內因、外緣。佛外因緣具足，有三十二相，八十隨形好，無量光以莊嚴其身，種種神力，種種音聲，隨意說法，斷一切疑；但眾生內因緣不具足，先不種見佛善根而不信敬，不精進持戒，鈍根深厚著於世樂，以是故，無有利益，非為佛咎。佛化度眾生，神器利用，悉皆備足，如日出有目則睹，盲者不見，佛明亦如是。

佛世界因緣不斷者，菩薩於眾生中，種種因緣讚歎佛道，令眾生發阿耨多羅三藐三菩提心，漸漸行六波羅蜜，然後於諸世界各各作佛。若於一國次第作佛，或於異國各自作佛，是名不斷佛國。復次，菩薩疾集智慧具足，作佛度無量眾生，欲入涅槃時，為菩薩授記：我滅度後，汝次作佛，展轉皆悉如是，令不斷絕。若佛不記菩薩者，則斷佛國。有佛之國，眾生知有罪福，人受三歸、五戒、八齋，及出家五眾等，種種甚深禪定，智慧，四沙門果，有餘涅槃等，如是種種善法。以是因緣故，佛國為貴。若佛國眾生雖不見佛，值遇經法，修善持戒、布施、禮敬等，種種涅槃因緣，乃至畜生皆能種福德因緣；若無佛之國，乃至天人不能修善。以是故，菩薩生願，欲使佛世界不斷。

（完）